



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 6

Yangia anidakangma :



Tir Yimyim



tiryimyim@aolima



tir yimyim

TAPAK 3

Cherry Blossom Festival takok ngua mongogo: Paul Lyngdoh

Gehlot-i Rajasthan Congress manifesto saya

VOL. XXI NO. 45 (ADOK 45) DIMAPUR RASEMNÜ (WEDNESDAY) YIMPOKSÜI (NOVEMBER) 22, 2023 ₹ 5.00

Naga nunger lanurtemi sobaliba mebenshir; BJP-i lisopur atema inyaksür: Advisor Tovihoto Ayemi

Kohima, November 21, 2023 (TYO): Naga nunger lanu putui alima ainba agi puadaksür oboula nunger sobaliba amadoker ta Tribal Affairs & Elections Advisor H. Tovihoto Ayemi-i ashi.

Hopta ka piyong National Jan Jatiya Gaurav Divas 2023 nung "Tribal folk song and dance" sentong nung jembidang Advisor Ayemi-i "Naga nunger inyaksangshi aser maparen kanga dang tobur tajung lir aser asenoki asen sobaliba benshitsu. Asen oboula nunger sobaliba, senmang aser tangatetba bilemteta asenoki sobaliba benshitsu" ta ashi.

"Naga loktiliba asen senmang wazuka ayutsü aser numa tanga benshitsu melena pilaa aoer. Iba ajanga asenoki asen maitsü samar. Asen loktiliba aser talisa lanuputui alima ainba dak ranglokdang asen sobaliba tangatetba nungi pilar" ta pai ashi.

Asenoki asen sobaliba takar aser maitsü mesamadaksütsüla. Asenok ajak külemi tarutsü lanuputu nem asen senmang amangdaksütsüla ta Advisor Ayemi-isa shisem.

Taintemi lanurtem nem asen senmang meimtsü tesayuba agütsütsüla. Parnok dang asen tesüba otsü tajungtem ashitsüla



aser iba jagi pamoki numa atangtsü aser sobaliba benshitsu ajungmesotsü ta paisa metetdaksü.

"Tribal folk song and dance sentong ya asenok ajak longjemer alima dang asen sobaliba sayuba sabang ka lir. Iba ama sentong ajanga asen sobaliba ajungketer aser asen tera den sendakteper" ta Ayemi-isa ashi.

Janjatiya Gaurav Divas dang Tribal Pride Day ta ajar aser iba ya Birsas Munda tasoba anogo nungtem nung amonger. India nüjiso atema rara nung Munda-i tongti shilem agia liasü aser Janjatiya Gaurav Divas ya linük nung lisopur nem tetushi agüja amonger, ta paisa metetdaksü.

Alima nung lisopur teimtiba aliba linük tanabubaji India lir. India nütsüng yongsük (2011 Census)

nung lisopur 8.9% (10.4 crores shi) liasü ta pai ashi.

"Ajisüaka küm aika linük nung lisopurtemi shilem tulu agiba ya majiteti dang aru aser BJP-i lisopurtem asoshi lenmang lapoktsü. Prime Minister Narendra Modi-i aniba BJP sorkari lisopurtem asoshi temulung agütsüba atema kanga pelar" ta Advisor Ayemi-isa ashi.

Centre-i lisopurtem atema tenzütsüba scheme aika ajanga Nagaland nung alirtemia tajangzük angur. Ministry of Tribal Affairs (MoTA)-i sorkar mangdang den putepa lisopurtem ajungkettsü asoshi mapa inyaka arur. Iba nung Tribal Cooperative Marketing Development Federation of India (TRIFED) dena lir, ta paisa ashi.

Ministry of Tribal Affairs ajanga Centre-i schemes aser

programs aika inyakba den külemi Eklavya Model Residential Schools (EMRS) tenzüka lisopurtem atema shisaliok mapa inyaker, scholarships agütsür aser linük ajungalen teacher training programs agütsür, ta Advisor Ayemi-isa ashi.

Yaküm April nungi December tashi Ministry of Tribal Affairs (MoTA)-i DBT ajanga lisopur kaketsür lakh 26.37 nem scholarships agütsü.

"Centre-i Eklavya Model Residential schools tasen 452 lapoktsü, schools tajungba akümtsü aser 2021-22 nungi 2025-26 tsüngda Centres of Excellence for Sports 15 lapoktsü atema Rs. 28,920 Crore mulunga agizükogo" ta paisa metetdaksü.

Iba sentong nung Tribal Affairs Department Secretary Angelina

Tajen-i tesentepertem pelaa agizük aser Director Sino Phom-i anküp tepela o jembi.

Iba sentong nung Nagaland nung kin 17- Sumi, Sangtam, Ao, Rengma, Phom, Chakhesang, Kuki, Lotha, Kachari, Tikhir, Yimkhiong, Angami, Chang, Khianiungan, Pochury, Zeliang aser Konyak nunger sobaliba ken atenba aser tsüngsangba shilemtem agia liasü.

Sentong nungsa arr atsütepba (Tug-of-war) aser Naga tribal cuisine tetoktepbatem liasü.

Tug-of-war nung takok angurtem: 1st Chakhesang tribe, 2nd Kachari tribe & 3rd Rengma tribe

Naga tribal cuisine nung takok angurtem: 1st Ao tribe, 2nd - Pochury tribe & 3rd - Rengma tribe.

Myanmar nung India nunger kümdanga alitsü metetdaksür

New Delhi, November 21, 2023 (Agencies): Ministry of External Affairs (MEA)-i Myanmar nung aliba India nunger asoshi travel advisory ka sangoktsüogo.

Myanmar nung India nungeri nungdak balaka melira senzusenbong masütsüla ta MEA spokesperson Arindam Bagchi-i ashi.

Myanmar nung security tensa kanga majung kümogo anungji India sensotemi non-essential travel masütsü metetdaksür. Myanmar nung alirtemi kanag kümdanga alitsü aser lendong atalokba tesemtemi maotsü metetdaksür, ta pai ashi.

MEA-isa Yangon nung aliba Embassy of India dang Myanmar nung aliba India nunger tenüng zülutentsü metetdaksüogo aser iba atema MEA website nung registration forms agüja lir.

MEA-isa kibong shia nung züngsem shia indang colour passport-size photographs anana meshiogo.

Tesüiba mapangtem nunga MEA-i Russia-Ukraine rara, Israel-Hamas rara, India-Canada mepetmesü aser Sudan rara nung kasa sangdongtem agüja liasü aser India nunger senso dang emergency form nung zülur agütsütsü shia liasü.

India den arrtsü anasa Myanmar kübok Chin state nung telungpurtem aser army tsüngda khatepba atema India-i süoki ia bilemba metetdaksüogo. Iba tensa ajanga Myanmar nungi refugee aika Mizoram nung arua jenoka lir.

India sorkari Myanmar nung rara anentsü aser army o telungpur teloktem tsüngda olemtep alitsü shia arur.

Manipur nung prangpong 6,000 auyaba nungi 4,000 mangu: Lt Gen Kalita

Guwahati, November 21, 2023 (Agencies): May 3, 2023 nungi Manipur nung Kuki aser Meitei nunger tsüngda raraba sülen security forces ket nung prangpong 6,000 tema auyaogo ta Eastern Army commander Lt Gen Rana Pratap Kalita-i ashi.

Iba nungi prangpong 1,500 ngutetogo saka prangpong 4,500 tema mengutet lir ta Mongulbarnü Guwahati Press Club nung Lt Gen Kalita-i osangbener dang ashi.

"Manipur nung Kuki, Meitei aser Naga nunger tsüngda senmang teblemtsü onük kar lir aser iba jagi tensa mesüngjemetet" ta pai ashi.

Meitei aser Kuki nunger tsüngda ken o tuluba aküm. Ozüing alema inyaksangshibo ajema kümogo saka police personnel aser tangalen nungi auyaa bener aoba prangpong-injang 4,000 tema mengutet lir ta Lt Gen Kalita-isa shisem.

"India-Myanmar arrtsülen prangpong-injang shibelenba azioka lirsaka ano karbo shibelenet. Prangpong 4,000 shi nübertem ket nung liri tangalen nungi bener arutsü nungdak madoker asütsü" ta paisa metetdaksü.

"Kuki aser Meitei nunger tsüngda mangatettep ya yimtenren khuret ka lir. 1990s nunga Kuki aser Naga nunger tsüngda raradang nisung 1,000 tema tepset" ta General Officer Commanding-in-Chief, Eastern



Command-isa ashi.

Myanmar nung tensa majungba agi nisung aika India nung arua jenokba indang tasüngdangba ka langzüdang "India-i prangpong mabenba nisung shia jenokdaksür saka telungpur teloktem nungi züngsemtem aser mozü shibelenetem marudaksür" ta pai langzü.

"Mezüngbo onok pei talidak toktsür aoer rescue and relief operations atema mapa lemzüksü. Iba sülen ozüing alema inyaksangshiba anendaksütsü atema meranga inyak, saka Kuki aser Meitei nunger tsüngda mepetmesü tuluba akümba ajanga tesem kar nung lendong maneni ataloker" ta Lt Gen Kalita-isa metetdaksü.

"Indo-Myanmar arrtsü nung nisungtem maitsü jangjaba maparen akangshitsü. Onoki MEA aser Manipur nung Myanmar Embassy den osang agiteper aser iba sülen ozüing alema inyaksangshirtem Myanmar sepaitem ket nung agütsür" ta paisa ashi.

"Telungpur shinga arrtsü

adena marudaksütsü. Prangpong abenba telungpur ka danga arura onoki aputsü. Ano onoki drugs aser arms abenertem kanga junga mita anüker aser apurtem ajak police ket nung agütsür" ta Lt Gen Kalita-i ashi.

"Tanü geopolitical tensa kanga melenshiba mapang Indian armed forces melenshitsu. Alima nung geopolitics ajunga melenshir aser iba ajanga asen armed forces dak-a kongshir. Tarutsü rara nungbo linük ajunga medener armed forces kijai dangbo takok mangutsü" ta Lt Gen Kalita-i ashi.

"Alima melenshir aser technology tsütsü kanga renloker anungji warfighting methodology-a melenshir. Iba jagi Indian Army-i 2023 ya year of transformation ta ajitetogo" ta paisa ashi.

Assam aser Manipur dena northeast state kar nung telungpur khuret aliba atema Kalita-isa "lanurtemi telungpur teloktem nung medendaksütsü atema loktiliba shilem tulu agitsüla" ta ashi.

"Tesüiba küm 10 tsüngda Assam nung infrastructure tajungba akümba aser terenlok aliba nguogo. Lanurtemi telungpur teloktem nung madentsü atema loktiliba shilem tulu agitsüla. Tamangba yimsü aser kin telemsa melii asenok ya India nunger ta mezüing jangjatsüla" ta Kalita-isa ashi.

DAYO-i CARP nung yariteper ajak dang pelar

Dimapur, November 21, 2023 (TYO): November 3 nungi 11, 2023 tashi Comprehensive Addiction Recovery Program (CARP) 1st batch takok ngua agitetba atema teyariteper ajak dang kanga pelar ta Dimapur Ao Youth Organisation (DAYO)-i metetdaksüogo.

Iba sentong ya ARTC 3rd Mile, Chumoukedima nung DAYO-i CO, No 2 Training Battalion ARTC & School Chumoukedima den yaritepa ayongzuka liasü.

"Nenoki bendanga agüja nungitba, aria bilema yariba,

sarasademtsüba aser senotsü tenla agütsüba ajanga CARP kanga dang takok ngua agiogo. Nenoki kanga mulungsoa yariba ajanga nungdakbapurtemi teyari balala nguogo" ta Media Cell, DAYO-i sangdong ka nung ashi.

"Nenok teyari ajanga onoki maneni wadang tuluba awaloka inyaka otettsü, sentong teimba agitettsü aser yi ajemba/mozü achiba nungi pilanür takütem nung temelenshi angutsü. Asenok ajak longjemer addiction madak aria bilemba ajanga takok ngudaksütsü" ta DAYO-isa metetdaksü.

ATI Nagaland nung NCS (P) aser danga batch training tenzükogo



Dimapur, Yimpoksi/Nov. 21 (TYO): Administrative Training Institute (ATI) Nagaland nung November 21, 2023 nü NCS(P) Batch of 2023-24, NPS(P) & BDO(P) Batch of 2023, aser 53rd Batch NSS(P) atema Foundation Course Training tenzükogo.

Iba sentong nung tesemdang tongti, Secretary, P&AR, Akunu S Meyase-i probationers tem nem tenüngsang agütsü aser iba training ya sorkar mapa inyakba nung mezüngbuba mera lir ta ashi.

Parnok (training agirtem) ya sorkar aser nüburtem asoshi jenjang tulu aketba rongsen ama akumtsü imlar, ta lai ashi.

Probationers tem dak Nagaland asoshi nükla tajung yua aliba ajiteter, ta Akunu-i ashi.

Training agiba mapang tayongzükba balala ajurutsü akok, saka yangji temolung ajema meblemstüla saka yimya tasen amshia tensa azüoktsüla, ta lai ashi.

Temelenshi tilateri ajanga sorkar mapa inyakba nungbo temelenshi tulu alitsü, anungji nüburtem tenzükba ya nükjidong tematiba ama züngshitsüla aser course coordinators tem nungi angazükba tajungtiba nung amshitsüla, ta Akunu-i ashi.

Course Coordinator aser ATI indang Joint Director, Kaholi Sema-i ita ana nungi asem tashi agitsü aliba NSS foundation course indang tongmelang agi rateta ashi.

Iba training nung departmental rules, regulations aser district level nung inyakyim angatetba densema lir aser

tatem nung tatidang ka agitsü, ta ashi.

A. Alem W. Longchar, Assistant Director, ATI ajanga NCS course tejangia lemsatepba mapang iba course ya küm ka nung noklem asem lemsar agir ta ashi.

Item noklem nungya 'cultural and heritage studies, district training with practical learning in various government offices, and attachments to key directorates in Nagaland' alitsü.

Sobaliba tali jangjatsü asoshi study tours alitsü aser final exam ka agia probationer temi course agidang parnoki ajangshibatem lemsateptsü aser duty atema yoktsü, ta Longchar-i ashi.

Iba sentong nung menden ya Additional Director, ATI & Joint Secretary, Labour & Employment, Bendanglila liasü.

Meluri nung Road Safety & Motor Vehicle Act indang awareness agütsü



Dimapur, Yimpoksi/Nov. 21 (TYO): Road Safety aser Motor Vehicle Act dak rangloker awareness sentong tajung ka ADC Office, Meluri nung November 21, 2023 nü ayongzükba liasü.

Iba sentong ya Müluori Küchienyiri Kügharü (MKK) ajanga Administration aser Police den lungjemer ayongzükba liasü.

Iba sentong nung Peter Shuya, Sub-Divisional Police Officer (SDPO) Meluri ajanga

"Traffic Etiquettes and Motor Vehicle Act" onük nung ajemdaker jembia liasü.

Pai iba mapang traffic rules, road safety aser gari junga anena ayuba yimyatem lemsatep aser lendong ajemtsü asoshi ajaki gari aniba yimya kanga junga meteta alitsü nungdaker, ta ashi.

Iba sentong tenzükba Sakuchingmak, Extra Assistant Commissioner (EAC) Meluri ajanga iba awareness sentong ayongzükba nükjidong

lemsatep.

Sentong nung MKK züngsemtem, police, Meluri Town indang ward chairmen aser administrative department nungi ketdangsurtem dena liasü.

MKK tir Chitsiarho Po menden sür agiba sentong nungya nüburtem lenmang nung senzüdang lendong balala nungi kumzükba alitsü yimyatem aser Motor Vehicle Act nung aliba ama inyaktsü asoshi angazüktsü maongka tajung agüja liasü.

BAPTIST HIGHER SECONDARY SCHOOL

MANGKOLEMBA

TEACHER VACANCY

(1) EDUCATION (M.A. B.Ed) (2) HINDI (Ratna)

Preference will give to candidate with experience.

* Last date: 15th December 2023

* Interview : 12th January 2024

* Contact No.: 9366291226 / 9612207452

Sd/-
Principal.

Mokokchung nung 'Anti Drug Campaign' sentong ayongzük



Miss Nagaland Kr. Hikali Achumi

Mokokchung, Nov 21 (TYO): HQ IGAR (North) aküm nung Mokokchung nung aliba 12 Assam Rifles-i "Anti Drug Campaign" sentong tulu ka yangi Mokokchung town hall nung ayongzükba kaogo.

Iba sentong nung special guest, Miss Nagaland Kr. Hikali Achumi-i jembidang, asen lima lanurtem mozümora achitsü angazükbaji talisa medemertem, movies aser social media balala ajanga nungi lir, ta metetdaksü.

Mozülar akümba (addiction) ya tashitak ka dang, anungji, iba atema anepalu balaka nungdaker, saka aiben asenoki mozülartem ya lokti nung meketmeseni amshir, ya nija khuret ka masü saka kibong shia, school, arogo, sorkar aser lokti ajak sakuku shilem agia iba anema raratsüla, ta lai tayongzükba ka agütsü.

2011 küm KRIPAFoundation den yaritepa Mokokchung Town Baptist Arogo-i mozülartem atema detoxification sentong ka ayongzükba liasü, arogo kati iba ama sentong ayongbaji kangabo

bulua maliasü. Iba sülenji arogo balalai iba nungi angazükba sentong balala tenzükba ao, ta lai ashi. Iba teblemstü atema arogo ya kanga dang tongtibang telok ka lir aser arogoi shilem tulu agitetsü imlar, ta laisa shisem.

State sorkaria iba teblemstü tsütsü sentong kar tenzükba aoba angazükba, iba ajanga lokti nung temelenshi karbo adoktsü imlar, ta lai ashi. Taküm kümzükba maparen nung sorkar, lokti balala den arogo aser kija kibong ajaki iba tongpang anema külemi senteper raratsü laisa ayongzükba jembia.

Tanü iba sentong nung Mokokchung SP Manoj Kumar IPS, Mokokchung ADC Chumlamo Humtsoe NCS, 12 AR Commandant Col. Rahul Gurung, Watsü Mungdang tir Arenla, IMDH SMO Dr. Temsumenla Longkumer, Rev. Dr. Bendang Longkumer parnoki shilem balala agia liasü. Telok balalai sentong lemsadakja kentenmenü ajanga tesentepertem longsodaktsü.

Chümoukedima district nung Hornbill Festival asoshi renemshir

Dimapur, Yimpoksi/Nov. 21 (TYO): Nagaland nung December ita tetenzüklen Hornbill Festival amungtsü aliba dak sendakba nung shisadokden senden ka Deputy Commissioner, Chümoukedima, Abhinav Shivam, IAS lenisüba kübok DC indang Chamber nung November 21, 2023 nü mena liasü.

Dimapur-Kohima 4-lane, NH-29 aser lendong timtem ajuruba mapang achayangtsü onüktem nung rangloker iba senden ya mena liasü.

Iba senden nung District Disaster Management kübok committee ka tentetsü aser yangji NHIDCL nungi züngem ajak aser contractor tem mapang osangtsüsang tekeraba nung prokshia yariteptsü jembia

liasü.

Tesem kar nung nübu yoktsü nungdakba indang asadanga jembia liasü. Department balala dang anogo ter Hornbill Festival mapang lendong timtem ajurura yariteptsü asoshi sentong yanglua agütsütsü tuyua liasü.

Home Guards aser Medical department tem dang lendong ajurutsü amai ajitetba tesemtem nung machinery aser ambulance tem yoktsü metetdaksü. Maneni NHIDCL dang iba ama lendong ajuruba mapang achayangtsü atema contingency plan renemtsü tuyu.

Hornbill Festival tajungtiba nung takok ngua mungtettsü asoshi department aser lokti tentet balala nungi yaritepa renemshiba mapang lir.

GOVERNMENT OF NAGALAND DIRECTORATE OF A H & VETERINARY SERVICES NAGALAND, KOHIMA CORRIGENDUM

Dated Kohima the Nov. 2023

NO.VET/EST/APP/222/2022-23 : In continuation to this Office Advertisement against the posts of driver issued vide even letter NO. dated 8th November 2023, Corrigendum is hereby issued as - that "Implementation of Reservation for Backward Tribes in the State shall be in accordance with the Notification issued vide NO.RCBT 5/87 (PT-II) dated 14-04-2011, 15-06-2012 & 04-09-2015"

SD/- DR. NSANTHUNG EZUNG
DIRECTOR, AH.& VETERINARY SERVICES
NAGALAND, KOHIMA

Tunnel chirepba nung sabanga alirtem indang video ka sayaogo



Uttarkashi district nung Silkyara tunnel nung sabanga aliba mapa inyakertem noksa nung angur. Parnok ya endoscopic camera ka amshia tangoka liasü.

New Delhi, Yimpoksüi/ November 21 (Agencies): Silkyara tunnel chirepba nung sabanga aliba mapa inyakertem indang mezüngbuba video Mongolbarnü temai adokogo.

Uttarakhand Chief Minister's Office (CMO)-i X sabang ajanga mapa inyakertem indang video ka lemsatopogo, koba endoscopic camera ka ajanga mangaokba lir aser ashiba agi, parnok tunnel telung nung kümzüka lir. Kasa post ajangsa, "nenoki Silkyara Tunnel nung sabanga alirtem indang live noksa yangi angur. Tunnel telungi endoscope camera yokogo aser mapa inyakertem ajak tunnel telung nung kümzüka lir," ta ashi.

Mapa inyakertem ya parnok indang white aser yellow

helmet tem semer sensaksema aliba nguogo.

Taoba mapang National Highways and Infrastructure Development Corporation Limited (NHIDLC) Director Anshu Manish Khalkho-i ashiba agi, mapa inyakertem koma ali aji jangjatsü atema pipeline ka ajanga camera yoktsü.

Kasa mapang nung tenem kolaklen nungi yokba vertical drilling machine Mongolbarnü tunnel tongogo. Ketdangsürtemi ashiba agi, yashi kanga dang takok ngua meter 57 talang aser inch trok tulu lifeline pipe ka kanga takok ngua perepa yokogo. Iba pipe ya sabang alirtem nem chiyongtsü aser tajemtsü tzü aika yoktsü atema amshitsü.

Maneni Uttarakhand High

Court-i Hombarnü, state sorkar aser central agency tem dang tang teküzmükba maparen balala inyaka aliba indang osang ghonda 48 tsüngda agütsütsü tetuyuba agütsüogo. Okadak ajangsa ketdangsürtemi tunnel nung sabanga aliba mapa inyaker 41 kümzüksü asoshi jenjang agibatem indang metetdaksütsü tetuyuba agütsüogo.

Ato Kilonser Narendra Modi-ia Hombarnü Uttarakhand chief minister Pushkar Singh Dhama den jembia tang teküzmükba maparen balala inyaka aliba indang osang agiogo.

CM Dhama-i PM nem osang tejangja agütsü aser ashiba agi, mapa inyakertem nem oxygen, chiyongtsü aser tajemtsü tzü peria agütsüdar.

Sri Lanka tepuokdak nungi chiokba angopur 15 Chennai tongogo

New Delhi, Yimpoksüi/ November 21 (Agencies): Angopur 15 shirnok Sri Lanka nung tepuokdak nungi chioka liasü, parnok Mongolbarnü Chennai tongogo.

Taoba mapang Tamil Nadu kübok Rameswaram tesem nungi angopur 22 international tzüym-i aiba atema Sri Lanka Navy-i pua liasü, parnok chioka rong ajanga Pacmbam tongogo.

November 18 nü Sri Lanka Navy-i rong ana sota angopur 22 dang ken o ashishia liasü.

November 18 nü angopurtem rongnungi lenirtemi Union finance minister Nirmala Sitharaman ajurua angopurtem

chiokdaksütsü atema temepeshiba ka agüja liasü, shirnok climatic condition balala ajanga memeteti international tzüym-i ia liasü.

Finance Minister-i, Sri Lanka nung Foreign Secretary aser Indian High Commission den jembia aser iba sülen angopurtem ya kümzüka liasü.

Angopurtem India-i meyipa aruba mapang Sitharaman-i jenjang tapet agiba atema lenirtemi kanga pelaba lemsatapa liasü.

Sitharaman-isa, angopur kibongtem dang Modi kübok sorkari Tamil nungertem tejangraba ya temaba jenjang

nung tokja lir ta ashi

Taoba mapang October 29 nü Tamil Nadu Chief Minister MK Stalin-i, Sri Lanka indang Navy-i Tamil Nadu nungi angopurtem aiben apuba indang ken o metetdakja external affairs minister S Jaishankar dangi shiti zülua liasü.

Stalin-isa, Palk Bay tesem nung Tamil Nadu nung angopurtem indang traditional fishing rights kümzüka toktsütsü atema takhangba agütsür aliba nenshia metetdaksü. Pai ashiba agi, October ita kija nunga angopudang amshiba rong 10 aser Tamil nung angopur 64 Sri Lanka indang navy-i pua liasü.



West Bengal Chief Minister Mamata Banerjee den Reliance Industries mendenbuba Mukesh Ambani aser state finance minister Amit Mitra nung Kolkata nung 7buba Bengal Global Business Summit lapokba sentong nung tangokba noksa nung angur.

Gehlot-i Rajasthan Congress manifesto saya

New Delhi, Yimpoksüi/ November 21 (Agencies): Rajasthan assembly elections atema Congress-i Mongolbarnü manifesto sayaogo.

Congress tir Mallikarjun Kharge, Rajasthan atema party in-charge Sukhjinder Singh Randhawa, chief minister Ashok Gehlot, state party tir Govind Singh Dotasra, manifesto committee mendenbuba CP Joshi aser taoba deputy chief minister Sachin Pilot nungeri manifesto - 'Jan Ghoshna Patra' - state party office nung saya liasü.

State nung sorkar maneni kümtetera, panchayat level nung recruitment atema scheme tasen ka aser caste census agitsü Congress-i parnok indang manifesto nung tenangzükba agütsüogo.

"Rajasthan nung onoki rongsenketzüng achaayangba ajanga Rajasthan nung aliba nüburtem nema adangtsü.

Rajasthan nung per capita income shilem 46.48 agi timba kümogo. 2030 küm tashi nungbo per capita income nung temaba jenjangi atutsü onok nükjidong lir. 2020-21 küm state GDP 19.50 tongogo, koba küm 10 tsüngda timtiba asütsü," ta Gehlot-i osangbenertem den sensaksemba mapang ashi.

Rajasthan nung aliba nüburtem nem teyari agütsütsü atema Gehlot-i taoba mapang tenangzükba tenet sangdongatoker liasü, kong

Griha Lakshmi Yojana kübok tetsürtem nem küm nung sen 10,000 agütsütsüba, kibong crore 1.05 nem LPG cylinder sen 500 agi agütsütsüba,

Gowdhan sentong kübok nashi scü seret nung sen ana agi alitsüba, sorkar tenzükertem atema old pension scheme asoshi temzüng ozüng, tzü mopung lendong balala ajanga takosa bener arutsüba mapang kibong shia nem insurance cover sen lakh 15 tashi agütsütsüba, English medium nung education agütsütsüba Chiranjeevi health insurance scheme sen lakh 25 nungi lakh 50 kümtsütsüba densema lir.

Manifesto sayaba indang jembiba mapang Kharge-i, "onoki tenangzükbatem ataloktsütsü. Party kari danga manifesto nung tenangzükba agütsüba shilem 90 danga inyaktetra aji Rajasthan aser Congress party atema takok tulu asütsü," ta ashi.

Rajasthan nung assembly election November 25 nü agitsü aser vote tem December 3 nü azüngtsü. 2013 legislative assembly elections nung BJP-i menden 163 koka parnoki Rajasthan nung sorkar kümteta liasü.

2018 assembly elections nung Congress-i menden 99 akok aser BJP-i menden 73 koka liasü. Iba sülen BSP aser Independent MLA tem teyari agia Congress-i Gehlot lenisüba nung sorkar kümteta liasü.

PM Modi aser UP CM Yogi na tepsettsü amokmerener ka apu

New Delhi, Yimpoksüi/ November 21 (Agencies): Dawood Ibrahim gang den sendaktepa lir ta shia Mumbai Police Control Room dangi amokmerena call asür ka puogo, ta police-i Mongolbarnü metetdaksü.

Police-i pua alisang yagi ashiba agi, Dawood gang-i pa dang Ato Kilonser Narendra Modi aser Uttar Pradesh chief minister Yogi Adityanath na tepsettsü asoshi tasa asatsü atema tetuyuba agüja liasü.

Iba nisungba yagisa Mumbai nung nungtugu medical institution JJ Hospital amaktsü amokmerena liasü, ta police-i ashi.

Indian Penal Code (IPC), Section 505 (2) kübok iba nisungba anema ken o ka benokogo.

"Dawood Ibrahim gang tenüng nung Mumbai Police Control Room dangi call süa amokmerener ka puogo. Nisungba yagi ashiba agi, Dawood Ibrahim gang-i pa dang PM Modi aser UP CM Yogi Adityanath pokseta

südaksütsü asoshi tetuyuba agüja liasü. Nisungba yagisa JJ Hospital poksatsütsü amokmerena liasü. IPC u/s 505 (2) kübok ken o ka benokogo," ta police sangdong ajanga metetdaksü.

October ita Mumbai police-i mail ka agizük kong mail yoksang yagi India sorkari sen crore 500 magütsüra aser ozüng raksar Lawrence Bishnoi mechikra Ato Kilonser Narendra Modi aser Ahmedabad nung pa tenüng nung yanglur aliba stadium poksatsütsü ta amokmerena liasü. Email ajangsa, iba kiralongrar telok yagi iba mapa asoshi nisungtem yokatokogo ta ashi.

Police-i ashiba agi, iba mail ya mezüngbo National Investigation Agency (NIA) dangi yok, koba Europe nungi yokba liasü aser NIA-i Mumbai police nem iba dak sendakba nung osang agüja liasü.

August ita-a, Ato Kilonser Modi tepsettsü amokmerena shiti ka züluba atema Kerala police-i nisung ka puogo.



TIR YIMYIM YIMOBILEM (EDITORIAL)

DIMAPUR RASEMNÜ, YIMPOKSÜI (YIMPOKSÜI) 22, 2023

Manipur nung telemsa tuluba akümer

-P Tiamongba Aier

Manipur nung Meitei aser Kuki-Zo nung tsüngda mepetmesü adoker ita trok tema süia aruaka telok ana tsüngda tangatettep kati maruteter aser telemsa tuluba ang akümer ama ajiteter. Mapang shia kin anaprong nungi züngsemtemi kati ka amakba tatalokbatem ajurua arur aser iba ajanga tensa tamajungba akümba den telemsa tuluba ang küma aoer. Külen, state aser Centre sorkartemia mepetmesü aliba tesemtem nung tensa süngjema akümtsüsa mapa inyakba balaka mangur. Kuki-Zo nung atema noktakba Indigenous Tribal Leaders Forum (ITLF)-i taoba Bodbarnü parnok teimba ser aliba district tem nung chief minister balaka shimteter ketdangsüa aotsü osang metetdakja laisü aser iba ajanga tekong merangtepa manenba sayur. Iba inyakyim ya temzüngibo memelar aser talisa iba osang ajanga Meitei nung talila jashidaktsür, kechiyong (Meitei) parnoki Manipur kübok hill district tem nunga special land ownership rights meshir. Intelligence Bureau telok ka aser Ministry of Home Affairs ketdangsürtemi Churachandpur nung sendentem amenba sülen hopta ka shi lir ITLF-i iba osang sangoktsü. Iba ajanga Centre sorkari Manipur nung tasa atonga inyakba nung tamakok anguba sayur. Manipur nung Bharatiya Janata Party(BJP)-i aniba sorkari law and order tiptema meyutetaka Centre-i lenisüba memelennür. Kuki-Zo nungeri state sorkar nung lenisüba melentsü akhanger saka Centre-i tensa azüoktsü atema Imphal valley aser hill area nung paramilitary forces mapa lezmükja lir. Centre-i yimjung bener arutsü atema Arrla 355 nung lateta aliba temzüngtem benshir saka Manipur nung iba Arrla benoka mali tabo ashir. Meitei nungeri state sorkar nung lenisüba melentsü memulunger aser iba jagi Centre sorkari parnok temulung meyirutsütsü merangba den Kuki-Zo nungeri state police dak temulung malemba onük atema inyaker. Ajisüaka Centre-i inyaksangshiba ajanga kin anaprong tsüngda telemsa tuluba dang kümogo. Centre-i lemtet tejangja ka magiba den olemtep maparen metenzükba ajanga kin ana tsüngda tesentaktep meyangluteter. Kin ana tsüngda tilateri tatalokbatem ajanga tensa mejungi akümer. Anungji Centre nung BJP lennirtemi ola madoki dang lira aser ketdangsübaren nung dang ajemdaker tensa azüoktsü merangra Manipur nung Meitei aser Kuki nungeri tsüngda apu melateti tensa tamajungba ang küma aotsü ana nung lir.

OLEMSABANG

India lima nung aiben Naga nunger mezüngmeshir

- L.Kika Pongener.

India lima tesem balala nung Naga nungeri kaketshirtem aser Company balala nung mapa inyakertem, tzümartemi aiben kanga mezüngmeshiba aser tim mesui benshiba otsü/osangtem angashidang khen-khenbo kanga jashia bilemer. Talisa, COVID-19 agi Lockdown asüba mapang, jila aika nung asen Naga nungertem para kidang (Rented House) alirtem nem timtem kanga agutsüba item-to bilemtetdang kanga jashia bilemer. Ano Jila tulutem nung tzümartemi aiben asen Naga nungeri, aser talisa North-east nisungtem dang 'Chinky'...ta sensamasa-a ajaba angazüka kanga mepelar. Ano India nungeri yimsusurtemi mapang shia Naga nungeri dang 'Azü shi achiba kin' ta, mesura 'Naga limaji Azü shi achiba lima'...ta sensamasaba ngua/angashia temulong kanga yirur. India lima tesem balala nung asen Naga nungeri kaketshirtem aser mapa inyakertem ajunga meyokteper noklang nung shilem ter (10 %) shi dang asütsü sudi. Ajisuaka, tzümartem asen Naga lima nung, 1960s nung Nagaland State akümba mapang nungi, tanü tashi nung arua alirtem...Punjabi, Bengali, Bihari, Marwari, Oriya, Kerela, Madrassi, Assamese etc. item kintem aika asen lima nung...School/College nung Tesayurtem, Office nung Officers/Staffs, Dokan Shishirtem, Rickshaw walla-tem, Tilla walla-tem, Motia-tem, Dekadar-tem, Mistri-tem, Jugali-tem, Kou mejepertem, Suoshi arurtem, Tsüngsem arurtem etc. item ajak ya meyokteper noklang nung shilem tokür (90 %) shi asütsü sudi. Anungji India lima tesem balala nung asen nisung aliba dang nungi kanga agi talila, asen Naga lima nung parnok tzümartem merijang aika arua lir, saka asen Naga nungeri-ibo parnok nem timtem kecha balaka magutsüi sadem-sadema aayanga dang lidaktsür.

Aji oda, India lima tesem balala nung tzümartemi asen Naga nungeri dang mezüngmeshia benshiba amaji asenok-ia benshi nungbo, ashiko, parnok tzümartem-jisa takoksa tuluba asütsü. Ajisuaka, asenok-ibo parnok ya kanga meima, pei nisung den küsa yaritepa/jungtepa alir. Aji oda, tzümartemi par lima nung Naga nungeri dang koda benshir, yamaji asenok-ia parnok mezüngmeshia tenung tamajung jaloktsüdi ta sura...Parnok 'Shilo' karbo 'Shitsü-Shingo' ta ajatsüsa, sorobangro agi kanga mesuka lir, kechiyong sentsü tanak ser tezüng agi pongbanger aika lir. Ano karbo 'Negro' ta ajatsüsa parnok soropangro agi kanga mesuka lir, kechiyong sentsü tanak ser tebang-mechi tulu aika lir. Ajisuaka, asenok dak Tsüngrem tsübuba shisatsü aliba agi, aser temeim taluposa aliba agi, asenokibo parnok dang meima benshir. Talisa, asen lima nung tzümartem meshimetsür paikati, Jila ajak nung kima-yimdong sunga aliba ya asen Naga nungertemi mesur masü no...??? Surabangla, Naga nungeri kar India lima nungji oa meshimetsüa alinung parnoki koda benshitsü...??? India lima nungji asen nisungji meshimetsüa lidaktsütsü asü melidaktsütsü...??? Ajibo khenyongi takoktsü masütsü sudi.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Arogo lenirtemi Pakistan tekülem kidang mi senloktsü

Lahore, Yimpoksüi/Nov. 21 (Agencies): Pakistan kübok Lahore nung tekülem kidang mi adokba asoshi mezüngbo Muslim nung extremist telok dak tenüing asenba sülen arogo lenir kati pai inyak ta nangzükba osang November 18, 2023 nü angashia tamangertem aoksa.

Brehostibarnü (November 16) tekülem kidang mi senloktsüba CCTV camera tem nung tangoka aliba video sayuba sülen arogo lenir aser kimen Zubair Akhtar Khokhar ya police temi apu, ta Lahore nung aliba Gulberg Presbyterian Church nung pastor, Rev. Samuel Massey-i ashi.

"Iba lendong atalokba mapang Zubair ya tekülem ki telungi aiba aser adokba video tem security camera nung tangoka aliba anguba sülen apu. Zubair sülen nisung shinga tekülem ki telungi mai," ta Pastor Massey-i Morning Star News dang ashi.

"Ni tetsübo nung mapa nungi anentsü asoshi Islamist telok temi amokmerenba shiti ka pai züluba nangzük. Pai aginüba ama matalok nung pai tekülem ki rongdoktsütsü lemtet aser ni amokmerenba ya asangsang ta sayutsü mechi Islamist telok dak tai tongloktsü."

Taila shiti October 16, 2023 nü züluba nung tamangertem dang ola tulu adoka mekülemtsü shia liasü.

Naseerabad police ajanga Pakistan Penal Code indang Sections 295 aser 436 kübok Zubair anema ken o ka benok.

Police temi Deobarnü onok jaoka parnoki ngutetba lemsatepdang onok aoksa, ta Pastor Massey-i ashi.

"Police temi Zubair den Hokulbar aonung asüngdangya asü, kechiaser pai kishi lapok aser mapang tatsüka lir tekülem kidang mi adokba indang osang küdang phone ajanga ashi," ta Massey-i ashi.

Arogo lenirtemi Zubair yimya ngur anisüngzük melie liasü aser arogo inyakim nung shilem kangabo magidaksü ta pastor-i ashi. Pastor Massey-i iba indang tali rasaa ashitsü memolung aser arogo züngsem ka anema yimjak nung jembitsü ya tim masü ta shia liasü.

"Iba inyakim yagi onok temolung shiranger, saka Khristan ka ama onoki maneni Zubair dang taochi sayutsü Tsüngrem dang sarasademtsü. Paia pa mapa asoshi sasar ta ashir, saka tangbo ozüng agi pa alentsü," ta pai Morning Star News dang ashi.

Iba mi yagi tekülem ki langpang, Laishiba aser danga

kakettem aliba cupboard ka, air conditioning units ana aser furniture kar rongdok, ta pastor-i lendong atalokli Morning Star News dang shia liasü.

Küm ana tejakdang Muslim nung kibong kati tekülem mapang sound system amshiba anentsü asoshi arogo anema police nem ken o ka agütsü, saka administration-i iba indang bentetogo, ta Pastor Massey-i ashi.

"Iba mapang Zubair-i anir telok kati iba indang ken o ya anepalua liasü. Pai tawa atalokba aser taoba mapang atalokba sendaktepa liasü, koba ajanga yangi aliba tamangba yimsü balala tsüngta timtem tulu liasü," ta pai ashi.

Ki o jen raksatsüba maparen nung arogo züngsem shilem agiba ya Pakistan nung aliba Khristanpur asoshi maksü lir, ta arogo aser lenirtemi ashir.

Ibai taktsü mapa lir, ta Church of Pakistan tir Bishop Azad Marshall-i ashi.

Dangartem ama iba osang angazüka jashir, ta Anglican church nung lenir kati ashi.

"Presbyterian tekülem ki rongdokba indang noksa aser video tem ngua ita asem jakdang Jaranwala nung tekülem ki aser nisung aliba ki rongdokba bilemteter. Khristanpur kati pei nükjidong ataloktsü mechi reshikangshir ama sayuba ya taochitsüka lir. Parnok inyakim ajanga tamangertem lendongi yoker ta parnoki mangateter," ta Marshall-i Morning Star News dang ashi.

Iba mapa tamajung ya ajanga Pakistan nung timtem ajurua aliba Khristanpur asoshi ochi obendang bushiba nung tetsükdaksü ajurur, ta Pak

Mission Society Chief Officer Adeel Rehmat-i ashi.

"Pakistan nung tamangba yimsü tsütsü reshikangshiba lir, saka tawa atalokba yagi yimya balaka sayur," ta Rehmat-i Morning Star News dang ashi.

"Khristanpur adianu anati tamangba yimsü mezüngmeshi ta tiazü nung tai tonglokja Khristan kati Koran shisaba sülen Jaranwala lendong ya atalok. Iba sülen kasa tesem nung Presbyterian pastor kati ano Islamist extremists temi pa tepsettsü merangba ama jemi aser tang Khristan kati par tekülem ki tepsettsü merang. Iba ama ashikülak aser yazüyapong mapa asenoki aitsütsüla, aji mesüra tamanger ajunga timtem ajurutsü."

Pak Mission Society ya tamangba yimsü nung amendaker nüburtem nem teyari agütsüba lokti tentet ka lir aser parnoki Pakistan nung arogo terenlok aser tashi itshitsü atema inyaker.

Faisalabad nung Rev. Eleazar Sidhu-i pa-sasa prangbong agi yiruba sülen Islamic extremists tem dak tai tongloktsüba mechi September 29 nü police temi apu.

Jaranwala kübok Kukranwala yimsü nung aliba Presbyterian Myong-Sang Nasreth Church indang pastor Sidhu-i police nem ken o ka agütsüba nung Muslim extremists temi September 3 nü Islamic creed züngdaksütsü ashi saka pai memolungba mechi pa dak akha ta shia liasü.

Open Doors ajanga alima nung Khristanpur alitsü asoshi linük tamajungtiba asadangba 2023 World Watch List nung Pakistan ya jenjang tenet buba nung lir.

ANOGO ABEN TSÜNGREM DEN

Tamang tetsüng

Ibri 11:8

Asenoki nisung kar dak temulung toka lira pai/lai ashibaji asenoki mela-mela inyaktsür. Ibri kaket nung Abrahami iba ochi tatishitsü sayuba angur. "Tamang ajanga Abrahami tashi anga" (Ibri 11:8). Pai Tsüngrem dang "tembar" ka ama amang. "Pa dang Tsüngremi tembar ta aja" (Yakob 2:23). Tsüngremji Tebu ta atema dang masü saka Paji tembar ka ta sayutsü Yisu aru. Tashi angaba ajanga kibong nung tanur aser tsürabur tembar ama jangratema alir. Yisu alima aliba mapang Pai temenen pur aser temeshipur ajak den tembar kuma liasü. Pa dang "Temenen purtem tembar" ta tenüing agütsü aser Pai Pa nütsüngtem dang tembartem ta aja. Amangtsü aser temulung lema alitsü asoshi tembar akümtsübaji kimong lir.

Tsüngremer ozüngtem asenok dangi Pa otem ajanga arur. Asenok item O nung mamang tashi angatsü makok. Adami tashi manga kechi Tsüngremi tajung aser tamajung metetba süngdong indang Pa dang ashiba Pai mamang. Mamangba agi Israel nungeri Tsüngrem dang tashi manga (Ibri 3:18,19). Tanü theology melen technology adokba putu ka nung Tsüngrem dak amangba tamang ayutsübaji temüla masü. Sayutsüngiba ren asertesayubaren ajak technology tsütsüi atsür odaktsür.

Tsüngremi itemji maitsür. Shidak inyaktsü itemji tenüngdaksü. Saka ajak Tsüngrem O koba memelenshir alir iba O-i ashiba ama alitsüla. Peter aonung tepiyong ango bushir kecha mapu, teyimla samar liasü.

Yisu ango pur masü saka sung mapa inyaker ka liasü. Kodang Pai Peter dang zütsük tzü tarok nung aoksa ashi, Peter asoshi ibai amangtsü tasak liasü. Saka kodang Pai ango apuba temetetba Yisu O nung ayu, pa asoshi tashi angatsü temüla aküm. Pai ashi, "Aji oda süaka nai ashiba ama" (Lk. 5:5).

Iba ama tamang Tsüngrem O maneni angashiba ajanga arur. Azüngba kisü nung masü, saka angashiba ajanga tetezü azüngba shiaji Tsüngremi jembir ta angatetba. Angashiba jagi amangdaksür aser amangba jagi tashi angaba nung yarir (Rom 10:16,17).

Mamangba ajanga temulung merangdaksüra tashi angatsü tasak kümdaksür. Ibri kaket züluri asenok nem tekümdangtsü agütsür, "Adianutem, taküm Tsüngrem nungi tsüktsüsa nenok kar dak mamangba temulungjang malitsü kümdangang" (Ibri 3:12). Kodang asenoki asenok dang ajasangji "taküm Tsüngrem" ta angatetter, tanur ka pei tetsü teku nung temulung lema ajungba ama bilemetsü. Shisabulu mali. Tebilemetsü mali.

Shiba Tsüngrem dang tashi angar, Tsüngrem dak amanger; aser shiba Tsüngrem dang tashi anger pai Tsüngrem dak amanger (C.H. Spurgeon 1834-1892).

Arogo lenir dak akhaba sülen sentep mezüngbuba agi



Phoenix, Yimpoksüi/Nov. 21 (Agencies): Arizona nung aliba arogo ka indang outreach director yimtung nung sayutsüngia jajadang tekolak nung injang agi akhaba sülen par arogo mezüngbuba sentong Deobarnü agia liasü, kong pastor-i tamangertem dang sarasademtsütsü ajungshia liasü.

Victory Chapel First Phoenix indang pastor Gary

Marsh-i Hans Schmidt dak atalokba indang otsü tongmelang agi ashi, shiba dak Bodhbarnü akha aser Hokulbarnüa 'serious condition' nung liasü.

Sayutsüngiri arogopur dang Schmidt, pa kinungtsü Zulya aser par kinunger asoshi sarasademtsütsü ajungshia liasü.

"Tsüngremi parnok yaritsü, anisüngzüktsütsü, Hans nem

taneptsü agütsütsü asoshi aküm. Temang tera arakzü, asenoki sarasademtsü ajisüaka doctor temi pa nüngdaker. Tekeraba nung temang kechi ajanga arakzüar taneptsü angutsü asoshi mejangjatet aser pa tekolak asenoki sarasademtsü nungi tzü ayim tenzük," ta nüngdaker, aser yangji CBN Digital ajanga shia liasü. Tsüngremer sayatenya nung Glendale, Arizona nung amangtsüla," ta Marsh-i ashi.

"Iba yagi nisung aika merenshiogo ta osang takum melenshitsü aser angazükba sülen ketdangtsür temi bushisüngdang tenzük. Tsüngrem temi bushisüngdang tenzük.

nüngdaker," ta pastor-i ashi. Iba tatalokba indang ya Deobarnü Victory Chapel nisung karibo meteta alitsü nung tekülem sentep tenzüka südi ta ketdangtsür temi sarasademba mapang pai iba amanger, ta Glendale Police Department nung public o ya ashi.

Arishi küm 26 tain tanur ana tebu Schmidt ya merenshia amshi südi ta temolung melemi Bodhbarnü la kinungbo indang noksa ka mozü kidangi anir ao. Saka Hokulbarnü social media nung CT scan nung pa dak injang lemsatep aser pa taneptsü agi akhaba putet. angutsü ta teimla akaba o shia

"Pai nisung memeteti liasü.

AO OSHI ANGAZÜKDAK:
TANÜ ANGAZÜKTSÜBA OJANG



Semtsü

(adj) külem meyong (jointly owned)

* Ozü kidanger den semtsü ak ka lir.

Semtu

(n) ki tila, alu lenmang nung anisüngzüksü yangluba ki (hut, midway rest house)

* Alu lenmang talang purtem atema semtu kanga nüngdaker.

OLONG PAITEP # 6621

	1		2			3		4		5
6								7		
					8		9			
			10							
11										
				12						
13		14		15						16
17										18

TIPIEN

- 1. Inyaker ajangtetba
- 3. Bangsemo adokdak
- 6. Shitak mesüi inyak
- 7. Ya mimong nung angur
- 9. Reprangzük
- 10. Tasola
- 11. S _ _ _ _
- 13. Yagi ajak ashioktsür
- 15. Ki aokba oset
- 17. Ak shi nung inokba tasen
- 18. Ishika

LANGTSÜNGLEN

- 1. Meshidak
- 2. Tanaben soshir
- 3. Iba anogo
- 4. Meshi
- 5. Yagi mi tsükloker
- 6. Shi tapu ka
- 8. Yagi ayimer saka ozü masü
- 9. Ajokba shiruru ka
- 12. Inyaktet
- 14. _ _ _ hi
- 16. Akümüli nungi pilar

OLONG PAITEP # 6620 TELANGZÜBA

TIPIEN :

- 1. Telok, 4. Aluru, 6. Ozüng, 8. Emk,
- 9. Kin, 10. Teti, 12. Süir, 13. Jen,
- 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kiooktsü,
- 5. Lenti, 7. Tajangzük, 11. teronem,
- 12. Sempa, 13. Jahaz

Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

OFFICE OF THE
TAMAJANGTSÜR TELUNGJEM CHANGTONGYA TOWN
P.O. Changtongya -798613, Nagaland
TENÜNGSANG AGÜTSÜR

Tamajangtsür Telungjem Changtongya Town ajanga ozü lar züngsem rongnungi jala asempi pei azüngba wadang nung takok naroküm tulu ngutetba asoshi asen lari tenüingsang agütsür aser tarutsü nung Tsüngremi nenok mangdang adalokdakjang ta sarasademtsür.

- 1. Rev. Dr. Rongsenmeren Jamir aser Wt. Tiasangla na jala Dr. Jongpongrenla Jamir-i Nagaland University nungi Livestock Production of Management Department nung Doctor of Philosophy (Ph. D) ngutet.
- 2. Wb. Takoyanger Jamir aser Wt. Temsujungla na jala Dr. Temjennaro Jamir-i Nagaland University nungi Doctor of Philosophy (Ph. D) in Mathematics ngutet.
- 3. Wb. T. I. Nukshi Jamir aser Wt. Imsunungla na jala Dr. Molongnenla-i National Institute of Technology, Nagaland nungi Doctor of Philosophy (Ph. D) in Physics ngutet.

Sd/-
N. Amongla
President.

Sd/-
Tiala Imkong
General Secretary.

Assam Transport minister-i road safety atema bike rally tenzük



Guwahati, November 21, 2023 (Agencies): Assam transport minister Parimal Suklabaidya-i nübertem den road safety osang prokshitsü atema bike rally ka tenzüksüogoo.

Anogo 30 nü sentong nung assembly constituency 126 prong asemtsü. Taküm January aser October tsüngda Assam nung gari lendong 6,001 atalok aser nisung 2,606

asü. Item lendong nungsa 4,800 yiruogo.

Iba sentong ya World Day of Remembrance for Road Traffic Victims nung tenzük aser "Path Suraksha Jan Andolan" ta ajar.

"Guwahati nung Path Suraksha Jan Andolan Bike Rally tenzükogoo. Ni tanü Goalpara tashi aoer aser iba ya Chief Minister Himanta Biswa-i ashiba ama road safety osang prokshitsü atema lir" ta Transport Minister Suklabaidya-i ashi.

"Onoki gari lendongtem nung nisung asüba aser yiruba kümzüksü atema road safety awareness rally tenzük. Ni Assam nung constituency ajak sema road safety awareness ajungkettsü" ta pai ashi.

Hombarnü Minister Suklabaidya-i Goalpara tonga ao aser iba nungi Dhubri district-i aotsü.

Cherry Blossom Festival takok ngua mongogo: Paul Lyngdoh

Shillong, November 21, 203 (Agencies): Taküm Shillong Cherry Blossom Festival ayonga amongdang tetsükdaktsütem ajuruaka tadenerem jangratema mongogo.

Bhoirymbong, Ri-Bhoi district nung aliba RBDSA Sports Complex nung benjung tembangba sentong nung Tourism Minister Paul Lyngdoh aden.

Anogo ananü musical extravaganza nung international artists aikati shilem agiogo. Talisa Ne-Yo-i Shillong Cherry Blossom Festival nung adenba ya pai India nung mezüing atema shilem agiba lir.

"Taküm Shillong Cherry

Blossom Festival ya takok tuluba anguba benjung lir kechiyong tourists aika aruba den artists teimtibai shilem agiogo" ta Tourism Minister Paul Lyngdoh-i ashi.

Iba benjung nungsa local entrepreneurs nungita yari aser local o global artists atema sabang agütsü.

Music band Sanam-ia Shillong dang Cherry Blossom Festival ayongba atema pelaba aser shilem agiba atema maongka ama bilemba metetdaksü.

Benjung tembangba sentong nung international, national aser local artists aikati shilem agia liasü. Parnok rongnung Boyzone

Vocalist Ronan Keating, Jonas Blue, Sanam, Lou Majaw, Blue Temptation, Da Minot, Nokpante, Rhem, Favian, Wanjop Sohkhlet, Banrap, Youngg Nate, DJ Me ban, Lamphrang aser Toshan nunger dena liasü.

Tourism Minister Paul Lyngdoh-isa Shillong Cherry Blossom Festival 2023 takok ngudaktsüba atema artists, sponsors aser nübertem dang pelaba metetdaksü.

Talisa taküm benjungmong nung Japanese ambassador adenba ajanga cherry blossoms indang exchange programme ka agia liasü.

NSCN(R) züngsem aser NSCN (K-YA) over ground worker ka apu



Itanagar, November 21, 2023 (Agencies): Arunachal Pradesh nung sepaitemi NSCN (R) züngsem ka aser NSCN (K-YA) over ground worker ka puogo.

Osang tejangja ka angazükba sülen Indian Army Digboi battalion aser Soha police külemi Tirap district kübok Soha nung mita aodang NSCN(R) züngsem Aman Jugli apu.

Aman Jugli ya NSCN(R) captain lir aser pai Kharsang,

Namphai aser Deomali tesemtem nung tashiyim agi sen saru. Pa ya Changlang district nungi lir.

Longding district nunga Assam Rifles Khonsa Battalion-i Pongchau police den külemi mita aodang NSCN (K-YA) over ground worker ka apu.

Iba nisung ya Khonglai Pansa'er jabaso Longna Pansa lir aser pa ya Kunnu yimtsüng nungi lir.

November 16, 2023 nü SS Construction Company Pangchao Iron Bridge mapa inyakerem pur aoba nung Pansa-i shilem agiogo ta police-i ashir.

NSCN (K-YA) tanishirtem tsüngda mangatetep adoka aliba mapang ka nung over ground worker puogo. Iba ajanga Arunachal Pradesh nung TCL region nung NSCN (K-YA) maparen nung tetsükdaktsü ajuruogo.

Somalia tüzümsüng lendong nung asür 50 jungogo



Mogadishu, Yimpoksüi/ November 21 (Agencies): Somalia nung tzunglu kanga sashia aruba sülen ajungbena tüzümsüng aruba lendong nung asür nisung 50 jungogo aser nisung 700,000 shi pei talidak ki toktsür jenshia aotsüsa kümogo, ta sorkar ketdangsür kati metetdaksü.

Mongolbarnü nungi ano tzunglu kanga sashia aru tenzükogo, anungji linük nung nüburtem tekangshi taliba akümsü imlar, ta paisa shisem.

"Tüzümsüng lendong nung nisung 50 süogo.. kasa mapang nung nisung 687,235 pei ki toktsür jenshia aotsüsa kümogo," ta Somali Disaster Management Agency Mohamud Moalim Abdullahi-i Hombarnü osangbenertem den sensaksemba mapang ashi.

"November 21 nungi 24 tsüngda tzunglu ano kanga sashia arutsü imlar aser iba ajanga tüzümsüng tali arudakja tasüba aser teraksatsüba tali adoktsü akok," ta pai ashi.

Horn of Africa tesem nung tzunglu kanga sashia aruba aser tüzümsüng aruba ajangashia arudar, koba El Nino weather phenomenon dak sendaka lir. Iba ajanga nisung aika süogo aser Somalia nung densema nisung aika pei talidak ki toktsür jenshia aotsüsa kümogo, kong aputem raksatsüba den nisung aliba tesemtem aika metsüngogo.

Tzunglu kanga sashia aruba aser tüzümsüng ajanga nisung meyrejang aika dak kanga mejungi kongshia parnok kiojen mesüra kisüt shiruru aser t s ü n ü s e n p o n g t s ü t e m raksatsüogo, ta International Rescue Committee-i Hombarnü sangdong ka ajanga metetdaksüba den nisung million 1.7 dak tema tang jongdak teyari nüngdaka lir, ta committee-isa metetdaksü.

"2023 küm tatem tashi taoba mapang tzunglu aruba dang nungi tali arutsü imlar anungji iba ajanga tang tensa mejungi aliba tamajungba kümdaktsütsü imlar aser 2023 küm tashi nungbo nisung million 4.3 yatzüra agi meneptsü imlar," ta

teyari balala agütsüba lokti tentet yagi metetdaksü. NGO World Vision-i ashiba agi, tang tüzümsüng aruba ajanga nisung aliba ki, school aser lenmangtem raksatsüogo aser iba ajanga tanurtem tejenokdak, chiyongtsü aser tajemtsü tzü amala kanga nüngdaka aliba tenügdakbatem agi anünga kümogo.

"Tüzümsüng ajanga tanurtem taküm kanga tasak kümdaktsüogo. Tang tüzümsüng aruba ajanga ki aika raksatsüogo aser iba ajanga tanurtem aser kibongtem pei talidak ki toktsür aotsüsa kümogo aser parnok karbo moapu nung khen atema tejenokdak yanglur jenoka lir. Parnok ya tashidak balala agi meneptsü ana nung lir," ta organization indang Somalia country director Kevin Mackey-i Hombarnü ashi.

Honibarnü United Nations humanitarian agency OCHA-i ashiba agi, Somalia nung tzunglu kanga sashia aruba aser tüzümsüng aruba ajanga pei talidak toktsür jenshia aoertem ya hopta ka tsüngda anasü agi timba kümogo.

"Iba den bendenloksema tesem aika nung lenmang, apu

aser airstrip tem raksaogo aser iba ajanga nüburtem aser supply balala belenshibera dak kongshio, koba ajanga oset nung jenjang tali kümogo," ta OCHA-i ashi.

British charity Save the Children-i Brehostibarnü ashiba agi, Kenya, Somalia aser Ethiopia nung tüzümsüng aruba ajanga tanur 16 densema nisung 100 dak tema süogo aser nisung meyrejang aika pei talidak ki toktsür jenshiaogo.

Horn of Africa ya tüzümpung melenshiba agia kongshitsü ana nung aliba tesem ka lir aser tawa tzü mopung dak sendakba nung lendong tesashitem taoba mapang dang nungi tali ajangshia arudar.

Iba tesem ya küm 40 tashi tzunglu maruba ajanga kanga kangshia aruogo, koba ajanga nisung million aika teyari nüngdaka kümdaktsü aser iba den tziünusenpongtsü aser kisüt shirurtem kanga akoksa liasü.

Humanitarian teloktemi, tensa tamajungba küma aotsü imlar ta shia alima kintem dang jenjang tapet agitsü ayongzükogo, kechiyong El Nino ya 2024 küm April ita tashibo aotsü imlar.

WAROMUNGTSÜR TELONGJEM KOHIMA TENÜNGSANG AGÜTSÜR

Waromungtsür Telongjem Kohima ajanga

1. Late. Lima Longchar aser Mrs. Temsupokla na jala Miss. Akumla Longchar.
2. Mr. B. Rolland Ao aser Mrs. Tiajungla na jala Dr. Arennungla R. NPSC/CTSE (Medical and Allied) tatidang 2023 nung Phramacist Grade-II, Health & Family Welfare Department nung takok tulu anguba den lanurtem asoshi tatishitiü tajung aser tajungshiba tulu yutsüba atema tenüngsang agütsür.

Tsünggremi nena taküm aser wadang teti moajangma.

Sd/-
Mrs. Temjemongla
Chairperson, WTTK

Sd/-
Mrs. Imnatula
Secretary, WTTK

METETDAKTSÜR

13buba Marsosang Football Trophy Chuchuyimlang nung 12th Dec. 2023 anogo nungi asaya tenzüksü. Anungji, tejangratem atema agütsüa aliba dokan nung admission form angutsü.

Walok, Mokokchung & Tems Enterprise, Chuchuyimlang.
Tongteprateptsü # 9612454540 / 7085251794

Congo nung army recruitment drive alidang nisung 37 ajemset

Brazzaville, Yimpoksüi/ Nov. 21 (Agencies): Republic of Congo yimtiba, Brazzaville nung army recruitment drive ka alidang nisung 37 ajemset, ta ketdangsür temi Mongulbarnü ashi.

Central Africa nung aliba linük koba dang Congo-Brazzaville ta ajar, iba linük indang army temi arishi küm 18 aser 25 tsüngta nisung 1,500 shimsü ta taoba hopta sangdonga liasü.

Iba lendong nung nisung 37 asü aser aika yirur lir, ta Ato Kilonser Anatole Collinet Makosso-i ashi.

Ato kilonser tashi nung crisis unit ka amenokogo, ta sangdong ajanga ashi.

Army nung shimoktsü teimla alirtem dang Brazzaville tiyong nung aliba Michel

d'Ornano Stadium bushia aotsü shia liasü.

Yangji alirtemi ashiba agi, Hombar aonung iba lendong tenzükba mapang nisung aika stadium nung liasü. Nisung kari gate alema aotsü merang aser iba mapang alanga ajemset, ta yangji alirtemi ashir.

Nütsüng yongsük million 5.8 aliba linük nungya mapa mangur jenti lir. Congo nung mapa inyaker shilem 75 shi informal sector nung, kar self-employed mesüra low-productivity mapa inyaker.

Taoba hopta recruitment centre tem nung anogo ka nung nisung 700 tashi tenüng zülüoka liasü, ta ashir.

Congo-Brazzaville nung lanur mapa mangur shilem 42 lir aser lanur aikati army nung maongka bushir.

Northern Gaza nung mozüki ajak shibangogo: Health ketdangsürtem

Gaza City, Yimpoksüi/Nov. 21 (Agencies): Northern Gaza nung aliba mozüki ajak tangbo service magütsüteter, ta tesem ajaklen nungi sapanger aliba Gaza indang Ministry of Health ajanga ashi.

Gaza north tsütsü mozüki balala nung adenshia aliba nisung ya shilem 190 agi timba kümogo, ta Gaza health ministry indang odongtar Ashraf al-Qudra-i ashi.

Israel-i bomb amshia al-Shifa mozüki tesem aika poksatsü, koba Gaza nung mozüki tulutiba liasü, kong tang tashi nisung 700 dak tema Israel army temu lungbanger lir, ta al-Qudra-i ashi.

Iba mozüki telung nung Hamas indang longpok aser command centre yanglua lir ta tai tonglokja Israel sepaitemi taoba hopta iba mozüki ya

sapanga liasü. Ajisüaka Hamas-i item taitüsü magizüker.

Al-Shifa Hospital nungi anujungi asoba kinü tanur 28 tashi temang anepalutsü atema Hombarnü Egypt-i anir ao, ta Palestinian authorities aser World Health Organization (WHO) ajanga ashir.

Gaza north tsütsü Indonesian Hospital nungi nisung 120 shi iba Strip south tsütsü Nasser Medical Complex-i anir ao, ta al-Qudra-i ashi.

Indonesian Hospital telung nung tang tashi yirur nisung 400 dak tema lir aser iba den medical staff 2000 aser dangar 2,000 dak tema jenoka lir ta pai ashi.

Mozüki telung nung alirtem ya Israel army temi "circle of death" nung yutsür aser mozüki temeket mesüra telung nung

shibasa arakzüdir akhar, ta al-Qudra-isa ashi.

Jakarta-i yariba mozüki nung amakdang Palestine nunger nisung 12 tepset aser aika yiru aser Israel nunger tank tem agi müketbanger lir, ta Gaza indang health ministry ajanga Hombarnü shia liasü.

Mongulbarnep Israel nunger tayimtsü agi Gaza indang deputy undersecretary of health ministry indang ki amakdang Gaza tesem balala nungi adenshiba kinunger nisung 56 yangji liasü, ta al-Qudra-i ashi.

Rescue team temi nisung temang 17 nguteta lir aser tanungba ya tang tashi ki raksaba agi anebanga lir ta ashir.

Totzü agi anungba aser Israel nungeri amakba ajanga northern Gaza aser Gaza City nung aliba mozüki nung power

raksaogo.

Parnok ya tajemtsü tzü, mozü aser nüngdakba osettsüset aser chiyongtsü agi kanga anünger, kechiaser Israel-i alilen aser anünglen nungi tanen makai amaker.

October 7 nü Gaza rara tenzüker occupied Palestinian territory nung aliba health complexes nung 335 ben amakba record lir aser item rongnung Gaza Strip nung 164 ben aser West Bank nung 171 ben maka lir.

October 7 nü Hamas-i Israel nunger dak tenzük yoker amakdang nisung 1,200 shi tepsetba sülen Israel-i Gaza nung anünglen aser alilen nungi amakdang Palestine nunger nisung 13,000 shi takum samaogo aser item rongnung tila tanur 5,600 aser tetsür 3,500 shi lir, ta ashir.

FIFA-AIFF academy atema AIFF aser Odisha sorkar na tenangzüktepba yanglu

Yimpoksüi/November 21, 2023 (Agencies): All India Football Federation (AIFF) aser Odisha sorkari, Odisha Football Academy, Bhubaneswar nung AIFF-FIFA Talent Academy amenoktsü asoshi FIFA Global Football Development tekolakba Arsen Wenger matsüngda Mongolbarnü Memorandum of Understanding (MoU) ka nung sign süogo.

Telok ana tsüngda MoU nung AIFF tir Kalyan Chaubey-i sign süa liasü. Iba sentong nung R Vineel Krishna, Commissioner-cum-Secretary, Department of Sports and Youth Services, Government of Odisha aser Tushar Kanti Behera, Odisha Sports Minister nata densema liasü.

"Linük 211 rongnung linük 150 dak tema nung youth system tejangja amenoka mali ta onoki asatetogo aser alima nung tajungtiba asayaba linüktem nung lanur asayartem atema education system

tajungtiba amenoka lir. Iba ya asadanga alima nung sempet aketba asayartem aika maongka mangur, anungji onoki iba sentong ya tenzükogo. Onok nükjidongji alima ajunga nung sempet aketba lanrutem nem maongka ka agütsüsu atema lir aser iba dak ajemdaker India nunga sempet aketba asayartem jangjatsü atema iba sentong amenokogo," ta tenangzüktepba nung sign asüba sülen Wenger-i ashi.

"Mapang kobika agitsü onoki mejangja, saka education medendra asenok kong ali idakji dang alitsü. Onok nükjidongji India football map nung inoktsüsu asoshi lir. Temaba jenjangi atutsü atema linük ajak temeden kasa dang lir. Tanurtem parnok koba tashi tajungba kümteter iba tashi tajungba kümdaktsüsu asoshi onok nükjidong lir. Football asaya küm 15 nungi metenzükttettsü saka küm pongu trok asüdang nungi

tenzüktsüla," ta pai ashi.

"India nung lenmang sadema lapoka lir, kechiyong India ya linük tulu ka aser nütsünyongsük billion 1.4 lir. Iba tetezü India ya alima nung temaba jenjangi atutsü koka lir aser iba ya senteper ajanzükner. Onok nükjidongji jenjang aketba asayartem aniteta India ya alima nung tajungtiba ka ama temaba jenjang nung toktsüsu asoshi lir," ta Wenger-i ashi.

Kasa mapang nung AIFF tir Kalyan Chaubey-i ashiba agi, "Pa (Arsene Wenger) tawabangba, lenisüba, technical plan aser strategy ajanga India nükjidong ataloktsü atema teyari agütsüsu. Asenoki jenjang tila ka agia FIFA U-17 World Cup atema merit nung qualify südi aser iba sülen senior FIFA World Cup atema qualify südi. AIFF-FIFA Talent Academy ajanga taruba küm asem tsüngda U-17 team tajung ka anitetsü, ta ni tamang akar."

Australia den T20 asaya atema India team sangdongogo

New Delhi, Yimpoksüi/November 21 (Agencies): Suryakumar Yadav lenisüba nung Australia den T20 asaya pongu asayatsü aliba atema shimba team nung World Cup final makokba India team nungi asayar asem dang shima lir.

One-day World Cup nung asayamung tepeyong asaya ka nung danga tamakok mongui asayaba sülen Deobarnü Ahmedabad nung asaya repranger 100,000 shi matsüngdang final asaya ya India-i akoktsü imla liasü.

Ajisüaka Pat Cummins-i aniba Australia team-i Rohit Sharma-i aniba team dang nungi tajungba asayarteta

wicket trok agi akok aser linük nung nisung million aika mulung raksatsüogo.

Tang mezüngbuba Suryakumar lenisüba nung India team T20 cricket asayatsü, kong WC ODI team nungi pa densema asayar asem dang züngoksema lir.

World Cup masaya tsüngda September ita India nung linük ana tsüngda asayamung ka asaya liasü, koba India-i 2-1 agi koka kokogo.

T20 asaya ya Brehostibarnü Visakhapatnam nung asaya tenzüktsü. Iba sülen November 26 aser November 28 nü Thiruvananthapuram aser Guwahati nung asayatsü.

T20 asaya pongu rongnungi tatembangbuba asaya ana nung Shreyas Iyer-a vice-captain ana team nung adentsü, koba Bengaluru nung December 5 nü aser Raipur nung December 1 nü asayatsü lir, ta Board of Control for Cricket in India (BCCI)-i sangdong ka ajanga metetdaksü.

India team: Suryakumar Yadav (Capt), Ruturaj Gaikwad (vice-captain), Ishan Kishan, Yashasvi Jaiswal, Tilak Varma, Rinku Singh, Jitesh Sharma (wk), Washington Sundar, Axar Patel, Shivam Dube, Ravi Bishnoi, Arshdeep Singh, Prasidh Krishna, Avesh Khan, Mukesh Kumar.



Shenzhen nung 2026 FIFA World Cup Asian qualifier nung Group C nung China aser South Korea na masaya tsüngda China nung asayartem tangokba noksa nung angur.

Miami nung 2024 Copa America final asayatsü

Yimpoksüi/November 21, 2023 (Agencies): Taruba küm 48bba Copa America asayamung Atlanta nung asaya-a tenzüktsü aser final Miami nung asayatsü ta asayamung ayongertemi metetdaksü. Iba asayamung nung South America linük ter aser North America linük troki shilem agitsü.

South American governing body CONMEBOL-i ashiba agi, June 20 nü asayamung nung mezüngbuba asaya ya Mercedes-Benz Stadium, Atlanta nung asayatsü aser July 14 nü final asaya Hard Rock Stadium, Miami Gardens, Florida nung asayatsü.

NFL stadium anaprongla nung ya Super Bowl ayongzüka asayaogo aser iba asayamung atema US nung stadium tem rongnung iba stadium ana ya-a densema lir. Asayamung ya yimya agi South America nung dang asayar saka 2024 kumbo

United States nung ayongzüka asayatsü.

"CONMEBOL Copa America tetenzükba aser tatembangbuba asaya nung America continent nung football asaya jangraratem agi stadium tem sünga adenshitsü imlar atar," ta CONMEBOL tir Alejandro Dominguez-i ashi.

"Taoba mapang aser tarutsü nunga asayatsü aliba CONMEBOL Copa America ajak dang nungi iba ya tajungtiba asütsü imlar atar."

CONCACAF spots trok atema qualifying tang tasayadak lir aser team pezü Mongolbarnü shimtsü aser ano 2024 küm March ita play-off asayaba sülen team ana shimtsü.

Iba asayamung ya US atema 2026 World Cup ayongzüka masaya tsüngda terenemshiba ka asütsü, koba Mexico aser Canada na den longjemer ayongzüka asayatsü asoshi renema lir.

ICC men's U-19 World Cup South Africa nung asayatsü

Yimpoksüi/November 21, 2023 (Agencies): ICC Board-i Mongolbarnü taruba men's Under-19 World Cup Sri Lanka nungi South Africa-i belener aotsü asoshi telemtetba agiogo.

Sri Lanka sorkari linük cricket board inyaksangshi nung jushiba atema ICC-i Sri Lanka cricket board suspend sütsüba sülen anogo 11 lir tang iba jenjang ya agiogo.

Temetetsü kaji linük nung cricket achaayangba nung sorkari jushiba indang osang ya Sri Lanka Cricket (SLC)-i ICC nem agüja liasü.

SLC aser sports ministry na joko mapa tatsüka mangatettep adoka arudar. Sorkari ashiba agi, SLC kettangsurtem ochi mashi inyakyim nung sendaka lir.

"SLC suspend sütsü aliba ajanga U19 World Cup ya Sri Lanka nungi South Africa-i belener aotsü. SLC suspend sütsüba sülen iba asayamung nung shilem agitsü aliba linüktem nem anogo ishika tejakdang osang agütsüogo. South Africa nung 2020 küm U19 WC ayongzüka asayaogo. Iba telemtetba ya Ahmedabad nung ICC Board senden nung agia liasü," ta ICC Board züngsem kati PTI dang ashi.

"Iba ajanga Sri Lanka indang bilateral aser domestic cricket daka kongshitsü," ta kettangsur yagisa ashi.

SLC tir Shammi Silva-i, tawa sorkari inyakyim nung maneni jushira U-19 World Cup ayongzüka asayatsü atema linük nem temeden agütsü aliba ya aginatoktsü akok ta tekümdangtsü metetdaksüogo. Iba asayamung ya January 13 nungi February 4 tashi asayatsü.

Hombarnü sangdong ka ajanga SLC-i ashiba agi, "SLC-i suspend sütsüba ken o bentettsü merangba mapang sports minister-ibo temzüng ozüng dak ajemdaker iba taitsüba bentettsü merangtsü melena media anisa onük tanga ka benoktsü meranger ama reprangteter."

"Iba ajanga pa tashi mashiyimi amshia SLC azüoktsü asoshi pai nüburtem aser tanga stakeholder tem atsüa arutsü merangba tebilemstü ka adokdaksür.

"SLC-i ken o tem kecha tebandang makai asadangtsü ayongzüker aser Sri Lanka nung cricket asaya rangben wazüka ayutsü asoshi rangloker lir aser mapangtong nung ochi tema adoktsü ta tamang akar," ta SCL-i ashi.

BILEMDANGANG

"Tebilemba kija agi nükjidong metongtettsü."